

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкyрeнцијски савјет

R J E Š E N J E
o odbijanju prijedloga za odlaganje izvršenja konačnog Rješenja Konkurencijskog
vijeća broj: 06-26-3-04-46-II/12 od dana 7. avgusta 2012. godine

Sarajevo,
septembar 2012. godine



Broj: 06-26-3-04-58-II/12
Sarajevo, 4. septembar 2012. godine

Na osnovu člana 25. stav (1) tačka e), člana 42. tačka 2) Zakona o konkurenciji («Službeni glasnik BiH», br. 48/05, 76/07 i 80/09), člana 18. st. 2. i 3. Zakona o upravnim sporovima Bosne i Hercegovine («Službeni glasnik BiH», br. 19/02, 88/07, 83/08 i 74/10), a rješavajući po prijedlogu za odgađanje izvršenja konačnog Rješenja broj: 06-26-3-04-46-II/12 od dana 7. avgusta 2012. godine, istaknutog od Općine Bosanski Brod, Svetog Save 39, 74450 Bosanski Brod, u Tužbi podnesenoj Sudu Bosne i Hercegovine (upravni spor broj: S1 3 U 11052 Fr od dana 31. avgusta 2012. godine), zaprimljenoj pod brojem: 06-26-3-04-58-II/12 dana 3. septembra 2012. godine, Konkurencijsko vijeće Bosne i Hercegovine, na 41. (četrdesetprvoj) sjednici održanoj dana 4. septembra 2012. godine, donijelo je

R J E Š E N J E

1. Odbija se Zahtjev za odgađanje izvršenja konačnog Rješenja Konkurencijskog vijeća Bosne i Hercegovine, broj: 06-26-3-04-46-II/12 od dana 7. avgusta 2012. godine, podnesen od Općine Bosanski Brod, Svetog Save 39, 74450 Bosanski Brod, kao neosnovan.
2. Ovo Rješenje je konačno i bit će objavljeno u «Službenom glasniku BiH», službenim glasilima entiteta i Brčko distrikta Bosne i Hercegovine.

O b r a z l o ž e n j e

Konkurencijsko vijeće Bosne i Hercegovine (u daljem tekstu: Konkurencijsko vijeće) je zaprimilo Tužbu, pod brojem: 06-26-3-04-57-II/12 dana 3. septembra 2011. godine, dostavljenu od Suda Bosne i Hercegovine (upravni spor broj: S1 3 U 11052 Fr od dana 31. avgusta 2012. godine), podnesenu od Općine Bosanski Brod, Svetog Save 39, 74450 Bosanski Brod (u daljem tekstu: Općina Bosanski Brod ili Tužilac) protiv Rješenja Konkurencijskog vijeća Bosne i Hercegovine broj: 06-26-3-04-46-II/1 od dana 7. avgusta 2012. godine (u daljem tekstu: Rješenje).

Tužilac predmetnom Tužbom traži poništenje konačnog upravnog akta/Rješenja Konkurencijskog vijeća, te je u skladu sa članom 18. Zakona o upravnim sporovima Bosne i Hercegovine istakao prijedlog za odgađanje izvršenja istoga do konačne sudske odluke.

Tužilac traži odgađanje izvršenja konačnog Rješenja jer smatra da bi izvršenje istoga nanijelo nenadoknadivu štetu koja se ne može popraviti, odnosno da odlaganje ne bi prouzrokovalo veću nenadoknadivu štetu protivnoj strani.

U postupku odlučivanja o prijedlogu odgađanja izvršenja konačnog Rješenja, Konkurencijsko vijeće je uzelo u obzir slijedeće činjenice:

- da je konačno Rješenje, broj: 06-26-3-04-46-II/1 od dana 7. avgusta 2012. godine (u daljem tekstu: Rješenje) doneseno u postupku pokrenutom na osnovu Zahtjeva za pokretanje postupka privrednog subjekta Društvo sa ograničenom odgovornošću za prenos zvuka, slike i ostalih informacija „ELTA-KABEL“ Doboje, Svetog Save 26, 74105

Doboj (u daljem tekstu: „ELTA-KABEL“) protiv privrednog subjekta Društvo sa ograničenom odgovornošću „CATV SAT“ za unutrašnju i spoljnu trgovinu, proizvodnju i usluge, Svetog Save b.b., 74450 Bosanski Brod (u daljem tekstu: „CATV SAT“) i Općine Bosanski Brod, Svetog Save 39, 74450 Bosanski Brod, radi utvrđivanja postojanja zabranjenog sporazuma, iz člana 4. stav (1) Zakona o konkurenciji (u daljem tekstu: Zakon);

- da je u tački 3. dispozitiva predmetnog Rješenja izrečena novčana kazna Općini Bosanski Brod u visini od 26.000,00 (dvadesetšest hiljada) KM, i privrednom subjektu „CATV SAT“ u visini od 7.500,00 (sedam hiljada petsto) KM zbog sklapanja Sporazuma o razvoju zajedničkog antenskog sistema (kablovske televizije) na području Općine Bosanski Brod, iz člana 4. stav (1) tačka b) Zakona, koje su dužni platiti u roku od 8 (osam) dana od prijema istog;
- da nisu osnovani navodi Tužioca o zastari, obzirom da je članom 55. stav (2) Zakona propisano da se rok zastare računa od dana kada je učinjena povreda, a u slučaju nastavljanja ili ponovnog kršenja Zakona, rok će se računati od dana prestanka povrede, te je evidentno da nije zastupila zastara, budući da je predmetni Sporazum o razvoju zajedničkog antenskog sistema (kablovske televizije) na području Općine Bosanski Brod sklopljen na pet godina i važio je do dana 21. oktobra 2011. godine;
- da su posljedice primjene predmetnoga Sporazuma o razvoju zajedničkog antenskog sistema (kablovske televizije) na području Općine Bosanski Brod, i danas prisutne jer je privredni subjekt „CATV SAT“ i dalje jedini kablovski operater na teritoriji Općine Bosanski Brod koji je dobio dozvolu za izgradnju kablovske infrastrukture za pružanje usluga kablovske televizije;
- da član 48. stav (1) tačka a) Zakona obavezuje Konkurencijsko vijeće na izricanje kazne maksimalno do 10,0% godišnjeg budžeta, ukoliko se utvrdi kršenje člana 4. stav (1) Zakona, odnosno da se novčana kazna mora izeći;
- da izrečena novčana kazna od 26.000,00 KM predstavlja 0,271% ostvarenog budžeta Općine Bosanski Brod za 2011. godinu, koji iznosi 9.567.959,43 KM, odnosno 0,045% ukupnog budžeta za period 2006. - 2011. godine koji iznosi 57.746.902,42 KM, te da je izrečena kazna 36 puta manja od maksimalno propisane koja iznosi do 10,0% budžeta (član 48. stav (1) tačka a) Zakona);
- da je rok za plaćanje novčane kazne od Tužioca istekao dana 21. avgusta 2012. godine (potvrda povratnica potpisana o prijemu konačnog Rješenja od dana 13. avgusta 2012. godine) i da ista nije uplaćena;
- da podnosilac Zahtjeva, nije podnio finansijsku niti računovodstvenu dokumentaciju na osnovu koje bi se utvrdilo štetno djelovanje izrečene novčane kazne za Općinu Bosanski Brod;
- da je privredni subjekt „CATV SAT“ izrečenu novčanu kaznu od 7.500,00 (sedam hiljada petsto) KM uplatio u ostavljenom roku dana 17. kolovoza 2012. godine (podnesak broj: 06-26-3-04-54-II/12), a da je ista iznosi 9,04% ukupnog ostvarenog prihoda ovog privrednog subjekta, odnosno u postotku 33 puta veća novčana kazna od novčane kazne izrečene Općini Bosanski Brod (što potvrđuje da je Konkurencijsko vijeće uzelo u obzir prilikom određivanja visine novčane kazne da je kršenjem člana 4. stav (1) Zakona odredbama predmetnoga Sporazuma predmetni privredni subjekt ostvario značajnu finansijsku dobit).

Prema članu 18. Zakona o upravnim sporovima nadležna institucija može odložiti izvršenje pobijenog konačnog upravnoga akta (konačnog Rješenja) kada utvrdi da su ispunjeni kumulativni uslovi propisani članom 18. stav 2. Zakona o upravnim sporovima Bosne i Hercegovine, a prema stavu 3. istog Zakona nije obavezna odložiti izvršenje ukoliko ne nađe da za odlaganje postoje drugi razlozi osim onih navedenih u stavu 2. Zakona o upravnim sporovima Bosne i Hercegovine.

U postupku odlučivanja po Zahtjevu je utvrđeno da Općina Bosanski Brod nije dostavila niti jednu relevantnu činjenicu niti relevantan dokaz koje bi Konkurencijsko vijeće smatralo opravdanim i odlučujućim za donošenje odluke o odgađanju izvršenja konačnog Rješenja, u smislu člana 18. stav 2. Zakona o upravnim sporovima Bosne i Hercegovine, te je odlučilo kao u dispozitivu ovog Rješenja.

Pouka o pravnom lijeku

Protiv ovoga Rješenja nije dopuštena žalba.

Nezadovoljna stranka može pokrenuti upravni spor pred Sudom Bosne i Hercegovine u roku od 30 dana od dana prijema odnosno objavljivanja ovoga Rješenja.

Predsjednik

Ibrica Lakišić